

PREDGOVOR

Muzej istočne Bosne je organizovao 2. savjetovanje muzejskih radnika na temu: *Muzeji – čuvari kulturnog naslijeđa*, koje je održano 17. i 18. novembra 2005. godine u Tuzli. U radu Savjetovanja su učešće uzeli muzeolozi iz Bosne i Hercegovine, Hrvatske i Srbije i Crne Gore.

Ovakav vid okupljanja se nametnuo kao neophodan, naročito nakon poslednjeg rata, u cilju povezivanja muzejskih radnika i njihovog zajedničkog djelovanja u zaštiti i promociji blaga koje se čuva u muzejima. Samim tim, želja nam je da skrenemo pažnju javnosti na muzeje, kao vodeće institucije u plemenitoj misiji očuvanja kulturnog naslijeđa.

Za razliku od bosanskohercegovačkih, muzeji u svijetu su postali kulturna središta i centri kulturnih zbivanja. Sve su prisutnije aktivnosti na udruživanju interesa i akcija na očuvanju svjetske kulturne baštine kao cjeline, u čemu muzeji imaju vodeću ulogu. U isto vrijeme, muzeji u Bosni i Hercegovini se bore za opstanak, a odnos društva prema ovim institucijama je nedopustiv koliko i prema kulturnom naslijeđu u cjelini.

Našu kulturnu baštinu, osim neadekvatnog okruženja, neodgovarajuće mikrokline, mikroorganizama, insekata, vandalizma, ratnih i prirodnih katastrofa, ugrožavaju i zanemarivanje i nedostatak društvene svijesti o univerzalnom značenju baštine.

U Bosni i Hercegovini, koja je prošla rat a još uvijek prolazi kroz društvenu, ekonomsku i socijalnu krizu, kulturno naslijeđe je toliko ugroženo, a institucije kulture su tradicionalno neosjetljive na savremene tokove razvoja muzeologije, da je neophodno radikalnim reformama iznova postaviti cjelokupan sistem zaštite i brige o naslijeđu, uključujući u ovaj problem, osim institucija i profesionalaca i širu javnost i državne organe.

Savjetovanje koje organizuje Muzej istočne Bosne je jedan mali, bitan korak ka ostvarivanju zajedničkog cilja, a to je očuvanje zajedničkog kulturnog naslijeđa Bosne i Hercegovine i približavanje naših muzeja svjetskim muzejskim standardima.